



Broj: 04/5-03/11-05-1-2234/17
Sarajevo, 14.11.2017.

PREDMET: Informacija sa 96. Rose-Roth seminara Parlamentarne skupštine NATO-a, održanog u Ljubljani, Republika Slovenija, 7-9.11.2017.

U organizaciji Državnog zbora Republike Slovenije i Parlamentarne skupštine NATO u Ljubljani je u periodu od 7-9.11.2017. godine održan 96. Rose Roth seminar PSNATO na kome su sudjelovali Nikola Lovrinović, predsjedavajući i Asim Sarajlić, član Delegacije PSBiH u PSNATO.

96. Rose Roth seminar o temi: „ZAPADNI BALKAN: Različito viđenje prošlosti, sadašnji izazovi i nastojanja za budućnost“ okupio je oko 150 učesnika, članica i pridruženih članica PSNATO, predstavnika najviše zakonodavne i izvršne vlasti Republike Slovenije, predstavnike međunarodnih organizacija, nevladinog sektora kao i brojne eksperte iz regiona Zapadnog Balkana i šire.

Prvog dana 96. Rose Roth seminara sudionicima seminara su se obratili Jasna Murgel, predsjedavajući Delegacije Državnog zbora Republike Slovenije u PSNATO, Paolo Alli, predsjedavajući PSNATO, Milan Brglez, predsjedavajući Državnog zbora, Andreja Katič, ministrica odbrane te Dušan Reljić, Njemački institut za međunarodne i bezbjednosne poslove.

Svi govornici su se u svojim izlaganjima osvrnuli na trenutačno stanje u regionu Zapadnog Balkana. Snažno je podržana NATO politika „otvorenih vrata“ u regionu. Po ocjeni uvodničara, evropski i evroatlanski put zemalja Zapadnog Balkana nema alternativu, gdje je posebice naglašeno da se poštuje spoljno- političko opredjeljenje Republike Srbije o njenoj neutralnosti.

Iako je region opterećen brojnim problemima, kao što su neriješena pitanja granica, službeni pokazatelji govore o ekonomskom rastu, o dobroj regionalnoj suradnji i opredijeljenju da se otvorena pitanja rješavaju dijalogom.

Tokom rasprave, postavilo se pitanje interesa EU i NATO na prostoru Zapadnog Balkana kao i o tome šta zemlje Zapadnog Balkana mogu ponuditi EU i NATO-u. Također, bilo je pitanja i rasprave o tome jesu li samo privredne i finansijske reforme i podrška u toj oblasti dovoljne ili se mora daleko ozbiljnije pristupiti političkim reformama u zemljama regiona.

Milan Brglez, predsjedavajući Državnog zbora Republike Slovenije, je posebice naglasio da je Slovenija krajnje opredijeljena da pomogne zemljama Zapadnog Balkana na njihovom evropskom i evro-atlanskom putu jer sigurnost i stabilnost regiona i Slovenije su proces u kome saradnji nema alternative.

To je posebno pokazala nedavna migrantska kriza. Slovenija će biti i u budućnosti zemlja koja pomaže jer je Zapadni Balkan njen spoljno-politički prioritet. Stabilnost Zapadnog Balkana nema alternativu, naglasio je Brglez.

Tokom drugog dana 96. Rose Roth seminara PSNATO razgovarano je o aktuelnoj političkoj i ekonomskoj situaciji u Bosni i Hercegovini i Makedoniji te toku i rezultatima dosadašnjih pregovora zvaničnika Republike Srbije i Kosova.

Sesijom, tokom koje se razgovaralo o stanju u Bosni i Hercegovini, predsjedavao je Metin Lutfi Baydar, potpredsjedavajući PSNATO.

Nakon uvodničara Jasmina Mujanovića, istraživača East West Institute, koji je govorio o temi: „Bosna i Hercegovina: između razbijenog autoritarizma i nove demokracije“ inicirana je diskusija tokom koje su se uključili brojni parlamentarci, kako iz regiona tako i šire.

U diskusijama, koje su se prije svega referisale na izlaganje uvodničara tokom kojeg situacija u BiH nije prikazana ružičastom i dobrom, učestvovao je Nikola Lovrinović, predsjedavajući delegacije PSBiH u PSNATO. Nikola Lovrinović je učesnicima 96. Rose Roth seminara iznio viđenje sadašnjeg stanja u Bosni i Hercegovini gdje se fokusirao na funkcionisanje Parlamentarne skupštine BiH, na aktivnosti i raspravu oko prijedloga Izbornog zakona te o niz drugih pitanja koja su aktualna u političkom životu Bosne i Hercegovine. Predložio je budućim panelistima PSNATO da kod kreiranja i pripreme narednih izvješća o BiH nastoje sačiniti izvještaje koji trebaju biti potkrijepljeni sa konkretnijim pokazateljima i primjerima iz bilo koje oblasti funkcionisanja države. Smatra da samo potpune informacije mogu biti od pomoći svima onima koji žele pomoći BiH u njenom napretku i razvitku.

Tokom završnih sesija o stanju u regionu Zapadnog Balkana razgovarano je o izazovima koje su donijeli problemi sa migrantskom krizom. Politički i sigurnosni problemi tzv. „Balkanske rute“ su po ocjeni eksperata i parlamenatarca, koji su sudjelovali u raspravi, pored evidentnih poteškoća pokazali da je regionalna suradnja u brojnim segmentima veoma dobra te da su subjekti sektora sigurnosti, zakonodavne i izvršne vlasti zemalja Zapadnog Balkana brzo reagovali i time su ublažili posljedice koje je sa sobom donjeo migrantski talas.

Razgovarano je i o ekonomskoj situaciji u regionu Zapadnog Balkana gdje su prezentovani brojni pozitivni trendovi u proizvodnji hrane, turizmu, prerađivačkoj i drvnoj industriji što je po ocjeni eksperata posebice karakteristično za BiH.

Razgovarano je i o mogućnostima boljeg povezivanja u drumskom saobraćaju, sigurnosti postrojenja za prenos energije te potrebi jačanja bilateralne suradnje u sferi ekonomskih odnosa. Zvaničnici država Zapadnog Balkana su pozvani da se suoče sa problemima i izazovima koje sa sobom nosi korupcija. Brojni trendovi, posebno u sferi javnih nabavki zabrinjavaju i sporo se traga za rješenjima koja će otkloniti nagomilane probleme u ovoj oblasti. Završnim sesijama je predsjedavao Ivans Klelentjevs, predsjedatelj Odbora za ekonomiju i sigurnost PSNATO.

Informaciju sastavio:
Željko Grubešić

PREDSJEDAVAJUĆI DELEGACIJE
Nikola Lovrinović